

# بِسْمِ اللَّهِ الرَّحْمَنِ الرَّحِيمِ



## Khutba

## Eid-ul-Fitr

12 Août 2019  
10 Dhul-Hijjah 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam – et **EID MUBARAK**, Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

**Hazrat Khalifatullah Munir A. Azim**  
**Jamaat Ul Sahih Al Islam**

### DUAH DE HAZRAT IBRAHIM (AS)

رَبِّ هَبْ لِي مِنَ الصَّالِحِينَ      فَبَشِّرْنَاهُ بِعُلْمٍ حَلِيمٍ

**Rabbi hablii minas-saalihiin. Fabash-sharnaahu bi-gulaamin haliim.**

Sa bane versets Quran Shariff ki mo fine réciter devant zot aujourd'hui li trouve dans Chapitre 37 Surah As-Saffat, Versets 101-102. C'est ene *duah* ki Hazrat Ibrahim (as) ti faire avec Allah.

Après sa *duah* ki li ti faire avec Allah (swt): « **Rabbi hablii minas-saalihiin.** » (*Ô mo Maître, accorde moi ene (zenfant) ki pour parmi bane bon dimounes*), Allah (swt) accepter so *duah* et réponde li (Hazrat Ibrahim (as)) : « **Fabash-sharnaahu bi-gulaamin haliim.** » (*Nous fine annonce li (naissance) ene garçon avec ene tempérament douce.*)

Alors sa bane versets là montré l'acceptation *duah* de Ibrahim (as) et Allah (swt) So promesse fine accomplir kot pour donne li ene bon garçon avec ene tempérament douce et versets ki mo fine lire montrer nous kot kan sa garçon là ti fine arrive à ene l'âge pour voyage avec (so papa), Hazrat Ibrahim (as) dire li : « *Mon petit, mo trouve dans mo rêve ki mo pé coupe to licou. Guette ene coup, ki to penser ?* » Li dire (so papa) : « *Ô mo papa, faire céki to fine gagne l'ordre. To va trouve moi, si Allah ouler, plein d'endurance.* »

Donc, dans sa verset là, Allah (swt) fine mentionne bane ki prend patience (*Sabr*) ; c'est sa même patience ki le garçon de Hazrat Ibrahim (as) fine montrer à l'heure de sa sacrifice là. C'est sa même ki Hazrat Ismaïl (as) ti fine dire ki, *Insha-Allah* to pour trouve moi parmi bane ki prend patience.

Donc, le sujet de sacrifice dans le chemin d'Allah ena tellement ene profond lien avec la patience ki si péna patience, bé sacrifice là aussi alle dans vide. Si avec full sincérité et avec fidélité Hazrat Ismaïl (as) pas ti dire ki : *Insha-Allah* to pour trouve moi parmi bane ki faire *Sabr* ; si li pas ti dire sa, bé sa jour là même la signification de sacrifice ti pour fini là-bas même. Et lera le monde ti pou reste priver de la réalité de sacrifice.

C'est sa le sujet de patience là même ki fine continuer pli devant. C'est sa sujet de patience là ki fine continuer tellement avec l'éclat dans l'époque de Hazrat Muhammad (saws) ki aucaine autre part ni dans l'époque d'aucaine les autres prophètes ou pas gagne bane tel exemples. La différence c'est seulement sa, ki kan Allah fine guette le cœur de Hazrat Ibrahim (as) et fine guette so l'esprit de sacrifice, bé li fine sappe li de sa action de sacrifier so garçon là, kot Allah (swt) dire dans versets 104-106, toujours dans Chapitre 37, Surah As-Saffat :

**« Kan tous les deux ti fine soumette (à l'ordre d'Allah) et ki Ibrahim fine renverse li lor so front, Nous fine crier li : 'Ô Ibrahim, To fine ena la foi dans to vision, et Nous récompense bane ki faire du bien comme ça.' »**

Kan ou lire sa verset là et ou analyse sa bien, ou pour trouver ki sa aussi fine dire ki pour ena bane tel zenfants ki pour vini dans l'avenir ki par zot même, zot pour présente zot licou dans le chemin d'Allah. Pas zot papa ki pour coupe zot licou, mais pour ena ene lotte bane dimounes ki pour passe couteau lor licou de sa bane zenfants là : pour faire mette boycotte lor zot, pou persécute zot, créer toute sorte la haine et difficulté contre zot, comme-ci dirai, pé passe couteau même lor zot, et sa bane là pour montrer sa grand patience là, et c'est zot bane vrais descendants spirituel de Hazrat Ismaïl (as), bane ki pour montrer application de sa *duah* de Hazrat Ibrahim (as) et de réponse excellent et sacrifice extraordinaire de Hazrat Ismaïl (as). Et sa descendant là, c'est Hazrat Muhammad (saws). D'ene côté li ene descendant, mais de lotte côté, puisque li le *Khatam-an-Nabiyyine*, li plisse ki ene papa pou Hazrat Ismaïl (as).

Donc, sa sacrifice de sang là ti ena pour continuer avec Hazrat Muhammad (saws) et so peuple. Allah (swt) fine dire ki si ou ouler, ou capave sacrifier ou zenfant dans le chemin d'Allah. Ou ena sa capacité là, mais à condition ki zenfant là aussi accepter. Faudré ki zenfant là complètement prêt pour sa et aussi li bizin ena la patience, parski parfois bane sacrifices dans le chemin d'Allah demande bane patience extraordinaire. Si dans ene pays ene *Momin* (croyant) subir quique la peine dans le chemin d'Allah, si bane les autres dimounes cause li le moindre tort, bé entier le monde le corps de tous bane croyants (*Mumineen*) souffert sa douleur là.

Alors, si nous dire ki bane sacrifices de vie ki ti donner dans le temps de Hazrat Muhammad (saws) ti comparativement facile, bé li pas correcte pour dire ene tel chose. Si ti dans ene société kot pas ti ena aucaine lien de fraternité, bé à ce moment là nous ti pour capave dire ki le sacrifice de Hazrat Ismaïl (as) ti supérieur à sa. Parski là-bas Hazrat Ibrahim (as) ti quitte so garçon dans ene désert kot péna nannié. Mais le fait est ki c'est sa même réalité ki sa verset là pé dévoiler, ki dans l'époque de Hazrat Muhammad (saws), parmi bane sacrifices ki ti pour ena, ti pour ena sacrifice de sang aussi, pour ena l'esprit de sa sacrifice là pour tous les temps. En tirant ene image de so bane suivants, Hazrat Muhammad (saws) dire ki le Jamaat de bane croyants li couma ene le corps, si le boutte d'ene lédoigt gagne piquer are piquant, si dans z'ongle gagne douleur, bé le corps en entier souffert.

Donc, le Jamaat de bane *Momin* ki ena ene sentiment, ki senti ene tel peine pour douleurs de zot bane frères, bé couma eski possible ki ene de zot li gagne touyer, sa pas affecter zot ? Et zot reste dans zot tranquillité et confort comme-ci dirai, sa douleur ou tuer là pas concerne zot, couma dire : *bé ki faire nous bizin affecter ?* Donc, sa bane kalité dimounes là, zot pas bane Jamaat de bane *Momin*, ki Hazrat Muhammad (saws) fine mentionner.

Dans bane descendants spirituel de Hazrat Muhammad (saws) fine ena ene grand Jamaat de bane *Momin* (croyants) ki fine amène le sacrifice de Hazrat Ismaïl (as) à so sommet. Extérieurement aussi et intérieurement aussi. Vraiment fine ena bocou de sacrifices kot fine ena couteau ki fine passe lor bocou licou. Mais c'était bane sacrifices volontaire. C'est pas par la force. Volontairement zot fine vine en avant. Ena bane dimounes pas comprend sa sujet là, ki kan Allah dire volontairement ou sois par force, bé ena ene bane dimounes sincères ki réponde l'appel et dire : « *Nous vine en avant volontairement !* ». Bé kot sujet de force là fine aller ? Si tout ti pou vini volontairement même, bé ki faire ti bizin mentionne le sujet de par force ? En fait, sa deux sujets là li entre en action en même temps.

Dans l'époque de Hazrat Muhammad (saws) li ti exactement comme sa même et jusqu'à ene certaine point dans l'époque de tous bane prophètes (as) li coumsa. Bane *Zaalimeen* (bane ki faire du torts) zot, zot donne sacrifice par force, mais bane *Mumineen* (croyants) donne sacrifices volontairement.

Donc, pour ene *Momin*, ou pas capave dire ki : *Ki beauté ti ena dans so sacrifice parski n'importe comment li pas ti ena lotte choix du fait ki l'ennemi ti fine fini attrape li et li pas ti ena pour sappé même. Donc, ki l'éclat ki ti ena dans so sacrifice ?* Mais bane dimounes pas conner ki en fait, la porte de *Kufr*, la porte de l'incroyance ti ouvert devant sa bane croyants là. Fine dire bane croyants ki guetter ena ene la porte de *Murtad*, de *Kufr*, de l'incroyance ouvert pour zot. Si zot oulé, passe par sa la porte là kot zot capave faire li, et zot capave aussi sappe zot la vie, zot dibiens, zot l'honneur etc. Mais zot rejette tous sa là et zot accepter volontairement sa la mort là.

Pareil commencement la Manifestation Divine en l'an 2001 kan le chef Pharaon entourer avec bane *Zaalim* avec zot bane fausse rapports ki ti envoyé à le calife Ahmadiyya à l'époque et ti expulser nous à cause Allah (swt) envoie bane révélations lor sa humble serviteur là. Alors groupe *Zaalim* donne l'instruction

pour ferme ene Masjid à l'occasion de Eid-ul-Adha à sa l'époque là, parski nous pas ti encore gagne l'ordre divine pour forme ene Jamaat de bane *Momin* et à sa l'époque là, nous ti pé voyager bocou alle dans le sud pour faire le Jummah et sa ti pé araze bane *Zaalim*. Zot ti oulé ki nous tombe dans zot joli ti lipié là, demande zot pardon, c'est-à-dire, pou sappe nous la vie, dibiens et l'honneur etc. – mais nous fine rejette tous sa là parski si nous ti tombe dans sa piège là, bé en d'autres mots, révélation ki Allah (swt) déssane lors sa humble serviteur là, li fausse, péna l'importance – *Nawzubillah min Zaalik*. En d'autres mots, la crainte créature ti pou plisse dans nous les cœurs ki la crainte du Créateur. Sa jamais sa pour arriver. Mette mo licou lor biyo. Mo donne mo licou couma sa bane zaimo ki mette zot licou pour faire *Zaba*.

Donc, bane *Zaalim* fine trouver ki nous pas fine céder. Faire céki ou envie, mais jamais mo pas pou oublier sa ki zot ferme ene Masjid dans le sud à cause zot conner ki nous pour alle faire nous Namaz Eid-ul-Adha là-bas, et sa Masjid là, li entourer avec bane Ahmadis, et le chef Pharaon donne zot l'instruction voyager, quitte zot la caze bonheur, alle faire zot Eid-ul-Adha dans ene l'autre l'endroit kot zot pé faire Namaz Eid. Et sa bane dimounes là ti bizin voyager, quitte ene Masjid devant zot la porte. Et sa Masjid ki zot fine quitter là, ki trouve devant zot la porte, c'est ene famille ki fine sacrifier et donne ene grand morceau terrain pour faire ene grand Masjid et ene centre Ahmadiyya dans le sud. Mais *Alhamdulillah*, à sa l'époque là, bane dimounes là ti trouver ki c'est ene l'injustice totale pour ferme ene Masjid et faire ene longue voyage pour alle faire Namaz Eid-ul-Adha ailleurs. Et alors, céki zot fine faire, zot fine regrouper dans ene la caze Ahmadi et zot fine faire zot Namaz Eid.

Donc, de nous côté, nous fine faire l'arrangement entre nous-mêmes et deux les autres familles Ahmadis ki ti trouve sa l'injustice là ti vine joindre nous pour faire Namaz Eid ensam avec nous dans la caze (à Pailles). Donc, bane dimounes capave trouve sa ki li ene sacrifice par force, mais en fait li ene zaffaire tout à fait volontaire. Pour nous, le Créateur passe avant tout et voilà malgré toute sorte kalité complot, palabre, persécution, fine kimé et mange nous la chair avec l'appétit dans tous Masjids Ahmadiyya pour ki zot tous ena ene la haine contre nous, nous fine vini volontairement. Sa moment là, avec bane tel persécutions, nous ti capave verse de côté bane *Zaalim*, mais nous pas fine faire li, arrive céki arrive. Personne pas fine capave casse l'esprit de nous l'obéissance envers nous Créateur. Nous fine accepter avec contentement sa bane sacrifices là et avec sa

sacrifice là, voilà ki azordi, Allah (swt) fine élève sa humble serviteur là avec ene Jamaat de bane *Momin*.

Donc, sa l'esprit de sacrifice là, ti commencer avec Hazrat Muhammad (saws) so bane disciples. Couma nous dire, bane Sahaba Karaam. Zot fine présente zot même avec bane bel éclat l'esprit de sacrifice de Hazrat Ibrahim (as) dans tous les aspects. Zot fine présente le sacrifice de Hazrat Ismaïl (as) avec ene nouvo l'éclat. Et lerlà le sacrifice de ene, fine vine le sacrifice des milliers et des milliers, et sa fine vine ene tel sacrifice ki pour continuer pour tous les temps. Et azordi nous pé traverse sa même l'époque de sacrifice ki bane Sahaba ti passer et façon ki Hazrat Muhammad (saws) fine enseigne nous le sacrifice de Hazrat Ibrahim (as) et Hazrat Ismaïl (as), c'est avec sa même détermination là ki nous fine lever aujourd'hui. Et sa c'est ene très grand *Ehsaan* (faveur) d'Allah ki autant ki mo capave trouver, mo trouver par la grâce d'Allah ki nous, le Jamaat Ul Sahih Al Islam ki pé accompli sa promesse là. *Alhamdulillah*.

Alors bane groupes *Zaalim* à travers le monde kot, kot ena nous bane membres à travers le monde, pé faire tout pour tout pour vire la tête de nous bane membres pour ki accepter céki zot et zot idole/s pé dire et rejette céki Allah (swt) fine dire ou, et alors zot dire ou : *Si ou faire sa, nous pou serre ou contre nous, nous pou mette guirlande dans ou licou – honore ou et nous pou faire fête pou ou et partage gâteau partout.*

Sa bane *Zaalim* là fine mette bane tel frayeurs dans le cœur de nous bane frères et sœurs du Jamaat Ul Sahih Al Islam kot faire croire ki péna personne pour sappe zot excepter zot-même ; alors zot dire : *Nous ouvert les deux chemins devant zot. Zot bizin vine vers nous, sois volontairement, sois par force, mais n'importe comment, zot bizin vini.*

Mais kan zot fine trouver ki bane Sahih al Islam fine rejette tous zot bane complots et cinéma ki zot pé faire, pas fine donne zot aucaine l'importance, à ce moment là sa bane Shaytaan là dire : *Tous céki nous pé faire zot là, là aussi zot fine rejeter. Tout fine alle fizette.*

Tout saki zot fine fer, sa pas fine affecter bane membres du Sahih al Islam. Au contraire, zot fine tini ferme, et en vérité, bane ki pou tini ferme, pou tini ferme même zot. Et sa fermeté là li pour zot propre l'intérêt. C'est Allah ki pour aide zot

et renforci zot dans zot croyance dans sa siècle là kan zot fine reconnaître et accepter l'avènement d'ene humble serviteur d'Allah avec le *Ruh'il Quddus*, ki Allah fine élever comme So Khalifatullah.

Alors, sa bane malfaiteurs là pé bouilli de rage ki bane membres du Sahih al Islam pas pé laisse zot tenter pou ré-rentre avec zot bane idoles. Zot trouver ki zot plan fine floppe et zot alle trouver ki au contraire, sa bane Sahih al Islam là, zot pé mette zot licou devant : *Si ena pou coupe nous licou, nous prêt, mais nous pas pour renonce nous la foi dans la Manifestation Divine, ni dans sa humble serviteur de sa l'époque là. Au contraire sa fine augmente la foi du Jamaat de bane Momin, bane Sahih al Islam kot bane Momin du Sahih al Islam dire ki : Ô Allah, volontairement nous vine vers Toi avec contentement, avec goût, avec enthousiaste.*

Donc, par la grâce d'Allah ou capave guette l'état du Jamaat Ul Sahih Al Islam, National et International ; ene Qurbani ki ti faire 4000 ans de cela dans ene désert tout près de Khana Ka'aba. Guette couma Allah fine garde vivant sa sacrifice là, couma fine faire sa développer et fine faire li progresser. Non seulement ene sacrifice fine vine des milliers de sacrifices, mais chaque aspect de sa sacrifice là fine monter avec bel l'éclat. Bane la grains di sable fine vine bane z'étoiles du ciel. C'est dans sa sense là même ki Hazrat Muhammad (saws) fine dire ki : *Guetter couma mo bane Sahaba fine vine bane z'étoiles. Maintenant zot népli bane la grains di sable ki ou ti pé écraser, zot népli bane ki ou ti pé trainer lor di sable chaud. Zot népli bane ki ou ti pé exposer au soleil et ou ti pé mette bane roches lor zot. Maintenant ou pas capave même concevoir zot stage ki zot fine arriver. Guette kot Allah fine amène zot. Li dire : Guette couma mo bane Sahaba fine vine bane z'étoiles et bane tel z'étoiles ki tous les temps pour guide ou.*

Sa c'est le sommet de sacrifice de Hazrat Ismaïl (as) ki le Quran fine faire nous comprend, et guette avec ki l'éclat ki fine ré-ouvert sa chapitre là et li appliquer dans le monde entier. Péna aucaine place kot péna bane dimounes ki prêt pour faire sa sacrifice là. De partout ena et zot prêt, zot dire : **Labbaik Allahumma Labbaik** – Nous présent Ô Allah, pour sa sacrifice là aussi.

Donc, sa c'est le Eid de bane Sacrifices, et contentement de sa Eid là ena ene profonde connexion avec sa bane sacrifices là. Autant ki ou pour comprend philosophie de sa Eid là, autant ki en comprenant sa, ou aussi ou pour prêt pour

bane sacrifices, autant même par la grâce d'Allah ou bane sacrifices pour accepter. Sinon Allah (swt) péna aucaine intérêt ni dans la viande et ni dans le sang. Allah guette sa *Taqwa* ki créer dans le cœur en résultat de sa sacrifice de sang et de la viande là. Ene *Taqwa* ki faire le cœur rempli avec *Zikr* Allah. C'est sa ki ou bizin créer dans ou, à ce moment là tous sa bane sacrifices là pour accepter. Et mo penser et aussi mo ena sa l'espoir là lor Allah ki Li pour donne nous sa *Tawfiq* là ki pratiquement parlant, à travers nous bane sacrifices, nous change couleur de sa nouvo l'époque là.

Aujourd'hui kan ou guette le visage de *Insaaniyyat*, ou pour trouver ki c'est ene visage ki péna ditout disang. Si ou coupe visage là, pas pou ena aucaine disang ki pou couler. C'est bane les corps mort ki pé marche marcher, couma dire péna aucaine l'âme là-dans. Guette figure de bane dimounes ki ena cancer disang, ou pou trouver ki aujourd'hui, le visage de *Insaniyyat* li pareil. Ene *Insaniyyat* ki péna ditout la spiritualité et péna le sang de la spiritualité ; ou pou bizin rempli disang de ou bane sacrifices là-dans. Ou bizin souffler ou l'esprit de sacrifice là-dans. C'est à ce moment là ki sa bane morts là pour capave revivre, et li pas possible ki sa grand révolution là arriver juste avec bane mots. Azordi *Alhamdulillah* et autant ki nous capave, nous remercier Allah (swt) pour sa, ki le Jamaat Ul Sahih Al Islam à travers bane sacrifices international, fine prouver ki Allah (swt) fine bien choisir sa Jamaat *Momin, Muttaqi* là dans sa siècle là. Si dans le monde ena quique Jamaat, bé c'est sa Jamaat Ul Sahih Al Islam là même ki rattacher avec Hazrat Muhammad (saws), c'est sa Jamaat là ki fine faire revivre sa vrai l'enseignement de l'Islam ki fine bafouer dans la main sa bane so-called *Mullahs* et sa Jamaat là, à travers zot bane sacrifices pour ene moyen pour donne la vie à sa le monde là en entier. *Insha-Allah*.

Donc, guette philosophie de sa sacrifice là bien. Ni la viande et ni disang de sa bane zaimo là arrive kot Allah. C'est ou *Taqwa* ki pour arrive kot Allah. Mo faire *duah* ki Allah accorde nous et garde nous toujours lor sa *Taqwa* là. *Ameen, Summa Ameen, Ya Rabbul Aalameen*.

*Eid Mubarak !*